

福建通志

卷一百一十九

共一百册

福建循吏傳卷十二

清二

陳衣德字章侯號浴齋閩縣人上世七傳爲諸爲所獎拔者三登官訓導
衣德康熙丁酉舉於鄉雍正癸卯成進士選直隸文安縣縣瀕河值河決
衣德多方措塞拯民於洪波巨浸中又爲之請豁倉儲穀舊逋八千餘石
免入官田地一百三十餘頃舊有協修長屯夫五十名常苦於奔波衣德
爲備陳其害除其役困民以蘇素有藻鑑邑人士爲所獎拔者三登進士
入登賢書尤慎於讞獄以平恕聞時有劇盜黃四鷺而黠嘗劫人久漏網
衣德得其情論如法大府有欲爲之地者諷使從寬典不可則以鏤刻中
衣德衣德去未幾而黃四復以劫敗人皆直衣德謂稍自渝雪可復官衣
德笑曰吾摧撞息機已久豈復能忍洪事上官且吾有二老親在其不以
三公易一日之養矣著有居易堂詩文集華陽趨庭草東遊漫草等集

姪孫

若霖撰
家傳

郭美字謙居一字名周閩縣人雍正癸卯進士知邢臺縣詢民疾苦賑荒斷獄悉公而明不使胥吏上下其手修學宮以振士習造普濟堂以恤貧在任八年吏畏民懷丁母憂歸囊橐蕭然以哀毀卒

乾隆舊志

張世燦字雲階閩縣人雍正癸卯舉人歷知增城饒平普寧興寧永安歸善新會七縣多善政始任饒平歲旱饑世燦先賑後詳上官重之邑之隆都隄近海幾潰於水世燦率工堵築三晝夜隄復完固邑賴以安於永安建迴瀾書院置學田以育士於歸善開水利灌田豁除浮稅以利民以疾乞歸世燦天性篤孝年十五親吮父癰居喪哀毀盡禮其歸田也葺家廟訂譜帙瘞族屬之不能葬者子岱宗乾隆壬午舉人

道光舊志

李振聲字崇墉福清人雍正癸卯舉人知沁源縣以明禮義端教化爲本時山西省以徵糧較輕欲議加征振聲力爭之反覆數千言議者蔑以屈卒從其請計每歲免浮額四千餘兩沁人德之

福州府志

朱明章字振白莆田人雍正癸卯進士知直隸安肅縣性慤直時直隸方

營水田安肅南梨雞爪地百餘頃舊莪黍稷者悉令照稻田設閘水耕閘
章以物土非宜壤厚而疏不能容水白上官種莪如故歲賴以稔民甚德
之閘章自以不合於時改教職授延平府教授

黃允肅字元靜一字思亭南安人晉江籍雍正癸卯進士知廣昌縣縣有
屯田九千餘畝旗丁每欺佃民允肅勘明疆界酌定租額給倭帖佃帖佃
不得匿田侵租旗丁不得額外橫索自是丁佃相安舊時地丁正供外有
兵折兵米兵糧耗費飯食茅竹折色物料賠亡籽粒各項莫可究詰允肅
請分徵並解併正雜爲一條立易知單分給民戶總納通縣三萬餘戶歲
省費千餘緡縣舊有十三年積逋至是民相謂曰百年乃得此官忍以通
糧累之去耶不數月至清都司練兵過嚴營兵爭擁出城欲爲亂允肅錄
叛兵姓名馳諭禍福皆感悟謝罪送還九年行取以主事需次適有廖玉
書因爭山殺人買族人代承允肅鞠實申按察司司命改欵招不從作告
城隍文自誓按察司怒以他案罷職倉庫有虧缺者兵民爭輸三日而足

勒碑於縣堂爲文記之南安知府游紹安聘主講道源書院準朱子白鹿洞規條以疾卒士人祠祀之允肅宅心仁厚未第時祖山有沈校尉三墳其子孫逃亡海豐豪家謀去其塚允肅訴縣禁止復捐金修葺在廣昌時前令張曉以墨褫爲白其誣前令黎民佐以朽腐倉穀六千餘羈棲十八載年九十四僅一幼孫爲請免助之歸嘗獲寧都縣越獄者寧化縣造賭具者幕府喜得增秩擬通報允肅曰我增二秩同僚奪一官矣急馳報同捕得免議以剛直取忌時咸惜之

朱仕琪字寶廷建寧人父霞傳在文苑仕琪以雍正癸卯舉於鄉知山東新城縣有棄尸縣界指狗屠金某所殺索金家得血衣及刃遂以爲證仕琪以屠者血衣刃不足異乃緩其獄密捕得殺人者誅之一縣稱神又捕治殺人廁上而取其財者獄上上官詰同謀且責仕琪故出人罪仕琪曰罪者已坐矣案無同謀知縣敢故入人罪耶力爭久之卒如讞以母憂去官官庫不失一錢吏民遮道送之子思永事親孝住宿殯宮一夕遇虎視

以爲牛虎亦遶道過之

謝莘字耕來建寧人雍正癸卯進士由工部主事遷戶部郎中差監倉場平糶例得耗羨悉歸公出知潯州府因失察屬吏鹽課左遷黃州同知權均州知州皆有惠政復以鞫盜過嚴左遷博野知縣值歲饑發倉賑濟先事後聞忤監司意遂請老歸

鄭宜字賡三永定人父昌麟隱居教子宜登雍正甲辰進士授江西龍泉縣遭秋潦爲災跪禱霖雨中水旋落嘗徒步阡陌慰勞農氓因以察知謠俗及山林奸宄故訟衰盜息泉人綜其政績曰治譜

謝人驛字叶東福清人雍正甲辰舉人知貴州貴定縣賦重民疲催科滋擾人驛設自限單分給民苗聽其依限自輸人皆便之時苗驅蠶動徵各路兵往勦貴定當孔道爲軍需所會一切輓運舊例設腳夫協理用一派十人驛知其弊逐戶編查免孤寡剔容隱以次服役勞佚以均腳夫不得因緣爲奸邑有平伐倉歲徵米二百石供平伐營就近支給後題請以平

伐米令民遠赴都勻上納令龍里縣散米給兵輸者既苦遠涉兵又仰給外縣兩受其病人驕抗議力爭得仍其舊擢知黃平州未任而卒

以上道光舊志

俞荔字碩卿一字崋山莆田人雍正甲辰春鄉舉第一是秋會試成進士

知廣東長寧縣卻鹽鐵錫鑪商餽金又有地丁羨餘銀千餘兩悉照田畝

分撥歸民權知連平州興利革弊甚有政績以失上官意罷歸行李蕭然

杜門奉母築堂曰迂溪嘯詠自得

乾隆舊志道光舊志

林寅字懷清沙縣人雍正甲辰舉人知廣東海豐縣縣有楊安田患潮衝寅爲築圍建閘墾復萬畝又以石橋場鹽漏荒陷課無所出請分派新堀中竈民德之民有售田而糧不除者寅爲履畝清釐得免逋負擢崖州知州改化州減除苛耗積弊一清值山水驟發以舟載男婦數千人入城避之復爲賑恤民無失所遷碣石理徭同知以母老乞養歸

李應機字神若泰寧人雍正甲辰進士知浙江景寧縣景民祀之博愛祠行取除吏部文選司主事綜覈銓政守正不阿以大學士張廷玉薦遷貴

州獨山知州數月苗獠從化攝都江通判古州苗變都江軍書旁午境不知擾平州逆民黎阿蘭訛言煽亂鄰郡惶怖以獨山安堵襁負踵至應機嚴保甲撫集之流民悉安尋致仕歸

王天慶字憲卿晉江人由廩貢援例通判雍正初年發山東委修濟南城事竣監臨清關革包攬之弊改建清淵書院延師課士遷沂州知州會沂州改府而嶧縣苦旱改授嶧縣知縣下車賑濟單騎親歷村庄按口分給臺兒庄故積匪藪偵知擒獲如律治之境內胥安旣而蝗蝻起以米購蝗數日蝗滅而禾不損移長清復移商河初商民之黠者爲十虎會橫鄉曲持令長短前知縣皆爲所誣天慶偵得其首按以法決遣之嗣以徵不及額干吏議詔仍以知縣用委修良鄉城旋補東鹿知縣縣當滹沱之衝河水漲沒禾稼卽開倉發賑水及城集鄉民壅土疊岸越日水退請築隄以護城環以楊柳後滹水棄故道衝及城郭十日而水不上隄人愈思其功丁外艱服闋補容城隨駕景州移慶雲以勞成疾乞休子蒲壁州判

以上
道

舊志

嚴夢兩

一作雨

字伯任長樂人儻善詩文康熙戊子副貢生補八旗教習

雍正初薦授中書奉命四川丈量民田精密不苛民懷其德同官多被譴而夢兩獨於事畢加一等議功例擢主事以親老乞外知慈溪縣有訟殺人者審鞫無凶器知府欲重其罪夢兩不可曰豈可殺人以媚上官乎攝台州寧波紹興三府同知大府倚重焉乾隆六年補義烏知縣專撫字緩催科修學宮及東江橋好士下賢歲時進秀民訓導之縣試所拔多英才邑人以比連青天連亦聞人名一鳴有遺愛於義烏者也後與攝府事某忤免官歸

長樂縣志

陳興國字昌可晉江人雍正丙午由安溪籍舉於鄉知東安縣縣西山綿亙數百里巨盜屢發興國親詣其地諭鄉民自相稽察地方以靖勤於聽斷民不能欺罪囚入獄例於成案後給糧興國捐已資一到卽給以卓異

贊

民積欠屯米二百餘石正耗百餘兩捐俸代墊出示免徵民歡

呼載道擢都察院都事爲新設漢缺奏章文牘必親檢點不倚書吏以疾卒於京

揚懿舉人

科目無考

浦城人雍正四年知鄞縣矜恤罪囚凡爭訟有關倫理者

反覆勸諭仍歸於好不輕加笞罰五年水六年旱蠲租發粟皆有實惠及民又開大嵩河工修理城垣使貧民得以力作餬口以堵築長春塘積勞成疾卒於官

鄒尙仁字紹孟上杭人父文士字簡滋康熙庚午武舉人篤孝爲鄉里所推先是邑鮮知學者文士築書舍延名師選族中子弟之俊秀者鄉人子弟之有志向學者肄業其中文教遂興尙仁幼力學與弟尙易以文行相切劘鄉有淫祠以禍福惑人每迎賽耗數千金至有踐踏死者仁與弟謀毀之雍正丙午尙仁舉於鄉知江西瑞昌縣攝德化彭澤二縣瑞昌舊學卑隘有廟聳其前仁下車徙廟南關卽其址爲泮池而更新學宮遂成鉅觀德化有冤獄廉其冤請大府更讞大府難之尙仁以去官爭卒平反而

誣控者伏辜彭澤漁戶以羣毆斃尙仁驗之僅左脇傷不致死鞫所獲諸人無承者尙仁欲別訪之賓佐謂緩恐被議姑以首名抵法尙仁喟曰父母斯民者惟免咎是圖如赤子何所擬非人則死者坐者均受冤矣後果獲殺人者而獄定移知臨川縣易寬而嚴案無留牘巡撫將以卓異薦而尙仁以積勞成疾遽歸積書課子孫不與外事倡立文社置社倉皆有法度

尙易字紹周雍正壬子舉人由乾隆丁巳明通榜授浦城學教諭改龍溪移建寧擢直隸阜平知縣地瘠民貧多流亡尙易開溝渠闢汙萊墾田百二十餘頃課蠶桑歲獲利數萬餘緡流亡盡歸增一千六百餘戶修建學宮書院延名師刊學約葺縣志文教亦興制府與直隸清官第一乾隆二十五年上幸五臺山過阜平召見記名擢廣東永安州知州移知馬平州永之士民爲立去思碑以年老告歸年八十餘卒

以上道光舊志

徐時作字鄴侯號筠亭建寧人八歲失怙卽能自勵於學稍長母余氏與

伯兄時伯內外交督教之學益勤家貧無所得書則從諸戚友借書手自纂錄誦讀之一日讀范文正公文集考論其行事慨然歎曰讀書人宜如是也自是立心制行一以文正爲法雍正丙午於鄉明年成進士漳浦蔡新欲保舉任京秩以願歸家更讀書辭居四年選知直隸成安縣歷調數邑爲政以人心風俗爲本順民之所欲而興革之所至必學舍葺忠孝節義諸祠以風眾庶聽獄訟立時審決庭無留獄暇則與士子講論學業在官十二年未嘗辱一士卽有敗行者以至誠訓誨之俾自悛改初任成安前署令蕭夢簡以平糶爲總督所劾坐以侵蝕追賠還蕭實貧無所得贓顧已誣服矣縊於獄至是委時作覆鞫時作鞫得其實不得已委曲爲輕其贓而代之賠償更資送其母子還鄉同官悉感歎焉邑清河村爲漳水所侵有棄地浮糧三百餘金舊業戶受賠累者四十餘年時作爲清查地畝編造魚鱗清冊按畝徵收舊戶免賠累而征額亦得不廢調邢臺時民有控牧羊戶盜其羊者時作憫牧羊戶之貧而薄責之控者不能平

復愬之府已而其人以符水治病母死送葬多人武弁謂是邪教聚眾密報制府調兵嚴捕之時作又力爲昭雪龍泉寺奸僧與其徒爭產啣恨積年募得遊方僧二人使戕殺之抉其目先是其徒佔廣東流民地涉訟旣訊而杖之矣至是得其死狀僧眾乃羣訟流民時作廉得其實捕遊方二僧決讞而置奸僧於法又嘗力請豁免水衝沙壓地畝銀之累民者凡二百餘兩其調清苑也屬保定首邑甫至會大水放賑而常平倉粟半朽腐總督欲派屬攤補時作力爭以爲不可卒爲別籌焉是時李衛實爲總督已而李薨合河孫嘉淦代其任賢時作抗直特疏薦升知開州治開二年除盜安民民以寧謐時桂林陳宏謀任天津河道札詢時政緩急時作陳清保甲禁游惰等四事宏謀皆善之調滄州州當水陸要衝風俗驚悍旗兵與民雜處夙號難治時作至去刻覈之政清戶籍詢疾苦申鄉約禁健訟民用肅然旗兵當東作之時常乏食倍息稱貸於富戶時作請發倉粟按口給借秋收還倉不加息歲以爲常是時政聲日起當道亦雅知之得

行其志駸駸可大用矣顧自以爲官久心力交瘁須鬢皆白遂告養而歸
在官日已節縮廉俸次第置遠祖祭田數百畝近祖義田千畝創室廬以
居伯兄仲兄且置田二百畝資邑人士之赴試者及歸又爲叔兄構居室
於是三兄皆有室廬又各爲置田數百畝以資其生尤念幼孤賴伯氏教
養誼兼父師會邑修文廟乃以千數百金奉伯兄俾獨力捐修後達部議
敘欽賜翰林院主簿於是修祖墓創祖祠倡首建濰川書院立學約設膏
火以贍生徒聘名師以教邑子弟又倡舉興賢會爲邑人士鄉會試行李
之資以前所置田二百畝爲之基更以叔伯兄弟子姓之名增捐租田人
以十畝爲率俾凡樂捐者易從焉自城邑鄉落有餘之家無不禮先之勤
勤懇懇勸其捐輸於中積其贏餘建興賢祠凡捐田入會者奉一主入祠
春秋受享或有孝子慈孫爲祖父捐田者尤嘉獎之形諸記載於是人益
樂從積田至三千餘畝其捐資於濰川書院及捐膏火費者亦建育才一
祠以報之其諸官社民社諸倉無不竭力成之生產稍有餘則置田積穀

儲諸倉者常萬石遇饑平糶故建寧附郭之民無憂歲饑卒年八十有一所著有崇本山堂詩文集閒居偶錄茶堂節錄嘯月亭筆記大抵有所聞見嘉言懿行必紀焉其他鐫刻前賢遺書及朋友故舊遺集凡十餘種

山木

居士文集

鄭炎字青陽福清人康熙戊子舉人登雍正丁未明通榜教諭同安遷廣西岑溪知縣岑溪素苦夫徭歲徵糧額外又有例金四百餘炎至悉除之每廷讞不施笞箠以至情感動民咸泣下經歲獄無留繫旋請改授教職補建安縣學教諭主講建安書院

鄭遠字懷伯仙遊人雍正丁未進士知直隸隆平縣值積潦之後賦逋民困力爲區畫民得稍蘇而賦亦足歲大稔產嘉禾兩穗至五六穗大府嘉之擢知江南壽州總督李衛重其才奏請仍留直隸授北路同知權永平正定兩府爲畿輔循良第一遷陝西延安知府調浙江金華修麗正書院置膏火親與諸生講學又拓修呂成公祠墓釐復祀田修何王金許四先

生墓置義租百廢具舉擢寧紹台道浙江按察使旋調直隸未幾致仕歸
鍾夢麟字碩仙莆田人雍正丁未進士知直隸高邑縣地高亢常苦旱夢
麟周度原野令田三畝掘井一計鑿五千三百餘井取水灌漑收穫豐稔
百姓名其井爲鍾公井總督李衛嘉之檄諸州縣倣高邑行之後以行取
授工部都水司主事

陳汝亨字學乾莆田人雍正丁未進士知四川安縣甫下車見學宮傾圮
卽捐俸修建又創書院以課士文風丕振縣產茶歲課九百餘金後山空
茶少課不足民典鬻以償汝亨請減免三之二攝綿州值大兵進勦金川
軍需供億毫不擾民大計卓異擢知西陽知州以疾歸

翁懷忠字維矩一字豸巖閩縣人籍福清雍正己酉舉人選知江南六合
縣調江西大庾知縣有兇犯罪應決賄吏數任案久懸拘獄中賂禁卒鬆
刑具日縱酒爲樂被極刑有異術以藥草煮酒服無所苦懷忠至廉其情
絕苞苴詳置重典民免以伸政聲上聞去之日民攀轅遮道留之贈衣繖

圖干名其中道卒子一桂乾隆甲午副貢生

鄭漢章字序華長樂人雍正己酉年拔貢試在武城知縣值

水災查勘無遺攝博興開濬小清河濟南所屬均感其惠調文登知縣移

霑化六年五災以勞致疾卒於官著有宦游舒嘯詩集

以上道光舊志

楊應葵字升山晉江人父廷勳榜姓林原名廷選字仲青先世自漳浦徙

居晉江康熙辛丑進士改庶常授職編修充國史館纂修官監督直隸賑

濟稽察霸保水利分修八旗志以疾假歸卒應葵雍正己酉舉人知長興

縣縣多死獄盡心研鞫矜全甚多遇災請賑令未下先捐俸煮粥以濟有

猾吏挾顯宦與幼弱爭田應葵守正不阿斷田歸幼弱而重責吏因疾假

歸

乾隆舊志
道光舊志

李先開字春谷漳浦人邑諸生由教諭改縣丞雍正七年擢山東安邱知

縣慎刑獄愛民如子莅任三月以疾告歸僉曰三月父母教養之恩勝於

三年爲立碑以誌不忘